

Hobaneng Bopaki?



SABATHA THAPAMA

Bakeng sa Boithuto ba Beke Ena Bala:

Jakobo 5:19, 20; Luka 15:6; Sof. 3:17; Johanne 7:37, 38; 1 Tim. 2:3, 4; 2 Bakor. 5:14, 15.

Teman'a Khopolo:

Hobane hoo ke ho molemo, ho khahlehang ho Molimo, Moloki oa rona, O ratang hoba batho bohle ba bolokehe, 'me ba fihle tsebong ea nete.' (1 Timothea 2:3, 4).

Takatso ea Molimo e kholo bakeng sa batho bohle hohle ke hore ba arabele lerato la Hae, ba amohele mohau oa Hae, ba fetoloe ke Moea oa Hae, 'me ba bolokeloe 'musong oa Hae. Ha a na takatso e fetisang ea pholoho ea rona. Lerato la Hae ha le na moeli. Mohau oa Hae ha u ka ke oa lekanggoa. Lereko la Hae le ka ho sa feleng. Tšoarello ea hae ha e fellowe ke matla. Matla a hae ke a se nang pheletso. Ka ho fapana le melimo ea bahedene, e neng e batla mahlabelo, Molimo oa rona o entsa sehlabelo se sehlo. Ho sa natse hore na re lakatsa ho bolokeha ha kae, Molimo o batla ho re pholosa ho feta moo. "Hobane hoo ke ho molemo, ho khahlehang ho Molimo, Moloki oa rona, O ratang hoba batho bohle ba bolokehe, 'me ba fihle tsebong ea 'nete.'" (1 Tim. 2:3, 4). Pelo ea Hae e laba-labela pholoho ea ka le ea hau.

Bopaki bo bua ka Jesu feela. Bo bua ka seo a se entseng ho re pholosa, kamoo a fetotseng maphelo a rona, ka linnete tse tsotsehang tsa lentsoe la Hae, le re bolellang ka hore na ke mang le ka botle ba semelo sa Hae. Hobaneng bopaki? Ha re utloisisa hore na ke mang 'me re fihletse limakatso tsa mohau oa hae le matla a lerato la Hae, re sitoa ho khutsa. Hobaneng bopaki? Ha re ntse re sebetsa le Eena, re kena thabong ea Hae ea ho bona batho ba bolokeha ke mohau oa Hae 'me ba fetoloe ke lerato la Hae

**Ihute thuto ea beke ena ho lokisetsa Sabatha sa la 4 Phupu.*

Ho Fana ka Menyetla ea Pholoho

Molimo o fana ka menyetla letsatsi le letsatsi hore batho ba mo tsebe. O ama pelo tsa bona ka Moea o Halalelang. O itšenola ka botle le botebo ba tlholeho. Bophara, taolo, le tekano ea tlholeho eohle li bua ka Molimo oa bosafeleng a nang le bohlahe bo se nang moeli le matla 'ohle. O hlophisa maemo le litlhothonolofatso maphelong a rona ho re hulela ho Eena. Leha Molimo a itšenola ka kamo ea Moea oa Hae, tlotla tsa tlholeho, liketsahalo tsa mahlohonolo, tšenolo tse hlakileng ka ho fetisisa tsa lerato la Hae le ka bosebeletsi ba Jesu Kreste. Ha re arolelana ka Jesu le ba bang, re ba fa monyetla o tsoang pele oa ho bolokeha.

Bala Luka 19:10 'me u e bapise le Jakobo 5:19, 20. Luka e re ruta eng ka morero oa Jesu oa ka ho tla lefatšeng? Re sebetsa 'moho le Jesu joang mosebetsing oa Hae oa ho boloka ba lahlehileng?

Ho latela Jakobo, “Ea khutlisitseng moetsalibe khelohong ea hae, o pholositse moea lefung” (Jakobo 5:20). Buka ea Baroma e matlafatsa mohopolo ona. Ho Baroma 1 le 2, bobeli Balichaba ba boneng tšenolo ea Molimo tlhahong le Bajuda ba fumaneng tšenolo ea Molimo ka boporofeta Lengolong ba lahlehile ha ba se na Kreste. Ho Baroma 3–5, moapostola o senola hore pholoho e tla ka mohau ka tumelo feela. Ho Baroma 6–8, o hlalosa kamoo mohau o lokafatsang molumeli e mong le e mong e boetse ke mohau o halaletsang. Ho Baroma 10, o hlalosa hore, “‘Hobane mang le mang ea rapelang lebitso la Morena, o tla bolokeha,’ ”(Baroma 10:13), e be o supa hore ha ho ea ka rapelang haeba a sa lumela, ‘me ha ba ka ke ba lumela ha ba sa utloa, ‘me ha ba ka ke ba utloa ha ho se ea ba bolellang. Re likhokahano tsa Molimo morerong oa topollo ho fihlela batho ba lahlehileng ka khanya ea evangeli.

Ha re fane ka bopaki hore re fe batho monyetla oa bona o le mong feela oa ho bolokeha. Re paka ho ba fa monyetla oa bona o tsoang pele ka ho fitisisa. Mosebetsi oa rona ke o fe leanong la Molimo la ho lopolla leloko la botho? Nahana ka taba ena, hape: ke batho ba ba kae ba utloileng evangeli ho tsoa melomong ea rona?

Ho Thabisa Jesu

A na ho na le motho ea kileng a u botsa, “Letsatsi la hau le tsamaea joang?” “Na tsohle li apere toka kajeno?” Haeba teng u ne u ka botsa Molimo lipotso tseo “Molimo, letsatsi la Hau le tsamaea joang?” U nahana u ne u tla fumana karabo ea mofuta o fe? Ka mohlomong e ne e tla ba e tjena. “Letsatsi la ka ha e sa le le thatafetse haholo feela. Likhapha li ile tsa tlala ka mahlong a ka ka lebaka la likampo tsa baphaphathehi tse sekete tse tletseng ka mohatsela, tlala, le bana ba bokollang. Ke tsamaile literata tsa litoropo tse petetsaneng tsa lefatše ka lla le ba se nang mahae le bafumanehi. Pelo ea ka e bohloko ke basali ba hleketsoang le bana ba tšohileng ba rekisetsoang bokhobeng ba thobalano. Ke bone tšenyō ea ntoā, litlamorao tse tšabehang tsa likotsi tsa tlholeho le poboli e bohloko ea mafu a fokolisang le hona ho bolaea.” “Empa Molimo, a na ho na le se tlišang thabo pelong ea Hau? A na ho na le se etsang hore u bine?”

Bala Luka 15:6, 7, 9, 10 le 22–24, 32. Lipale tsee li fella joang, ‘me pheletso tsee li u bolella eng ka Molimo?

Leholimo lohle lea nyakalla ha ea lahlehileng a fumanoa. Lefatšeng le tletseng bokulo, litlokotsi, lefu, re ka tliša thabo pelong ea Molimo ka ho arolelana “litaba tse molemo” tsa pholoho le ba bang. E ‘ngoe ea lintho tse susumetsang ho arolelana ka lerato la Krete ka ho fetisisa ke ho tseba hore ho paka ho tliša thabo pelo ea Molimo. Nako tsohle ha re senola lerato la Hae, leholimo lohle lea bina.

Bala Sofonea 3:17. Molimo o arabela joang ha re amohela mohau oa Hae o pholosang?

Nahana ka ketsahalo ena. Ka lebaka la bopaki ba hau monna e mong kapa mosali kapa moshanyana kapa ngoanana o amohela Jesu e le Mopholosi oa hae. Jesu oa nyakalla. Leholimo lohle le hooa pina ea thabo, e be Mopholosi oa rona ea matla o bontša nyakallo ka ho bina. Ke eng e ka putsang ho feta ho tseba hore ho paka ha hau ho tliša thabo pelong ea Molimo lefatšeng la masoabi?

Ho Hola ka Ho Fana

Leoatle le Shoeleng (The Dead Sea) ke sona sebaka se tlase ka ho fetisisa lefatšeng. Ka ho ba likhato tse 1,388 ka tlase ho boemo ba leoatle, le nkuoa e le lona leoatle le tlase ka ho fetisisa lefatšeng. Noka ea Jordane e phalla ho tsoa letšeng le Galilea e be e tsoelipana joalo ka phula ea Jordane ho fihlela e fella Leoatleng le Shoeleng.

Maemo a leholimo a mocheso le ho omella, ka lebatamahali la letsatsi le maemo a lehoatata, a baka hore metsi a ome ka potlako e kholo. Ka hobane letsoai le matsoai a mang a Leoatle le Shoeleng a etsa linoko tse 33.7 lekholong, ke lintho tse fokolang tse khonang ho phela metsing a lona. Ha ho na lihlapi, ha ho limela; ho teng feela tse nyane hoo li sa bonoeng ka leihlo le likokoanahloko botebong ba lona.

Maphelong a rona a Bokreste, haeba mohau oa Molimo o phallang maphelong a rona ha a phallele ho ba bang, re tla ema 'nqa e le 'ngoe re hloke bophelo joalo ka Leoatle le Shoeleng. Joalo ka Bakreste, ha se tsela eo re lokelang ho phela ka eona eo.

Bala Johanne 7:37, 38 le Luka 6:38. Ka ho fapana le boiphihlelo ba Leoatle le Shoeleng, ha balumeli ba amohela melatsoana e hlasimollang ea metse a bophelo ho tsoa ho Kreste, ka tlhaho ho etsahala eng?

“Molimo o ne a ka fihlela sepheo sa Hae sa ho pholosa baetsalibe ntle ho thuso ea rona; empa e le hore re tle re bope semelo se kang sa Kreste, re lokela ho nka karolo mosebetsing oa Hae. Hore re tle re kene thabong ea Hae,—thabo ea ho bona meea e lopollotsoeng ka sehlabelo sa Hae,—re lokela ho nka karolo mesebetsing ea Hae bakeng sa topollo ea bona.”—Ellen G. White, *The Desire of Ages*, leq. 142. “Bao ba tla hlōla e ka khona ba lahle bo-bona; ‘me ntho e le ‘ngoe feela e ka fihlelang mosebetsi oo o moholo, ke ho ba le chescho e tukang ea pholoho ea ba bang.”—Ellen G. White, *Fundamentals of Christian Education*, leq. 207. Re hola ha re ntse re arolelana le ba bang seo Kreste a se entseng maphelong a rona. Ha re talima tsohle tseo re li neiloeng ka Kreste, ke eng ha e se boikhabo feela bo ka re sitisang ho arolelana le ba bang seo le rona re se neiloeng? Ka eona nako eo, haeba re hloleha ho arolelana ka tumelo ea rona, bophelo ba rona ba semoea bo tla ema tsi joalo ka Leoatle le Shoeleng.

Maiphihlelo a hau kaho pakela ba bang e bile a fe, ha u ba rapella, ha u fihlela litlhoko tsa ba bang? Maiphihlelo aa a amme tumelo ea hau le leeto la hau le Morena joang?

Ho Tšepahalla Taelo ea Kreste

Botšepahi ho Kreste bo hloka boinehelo thatong ea Hae. Bo hloka kutlo ea litaelo tsa Hae. tholoana ea teng ke pelo e otlelang hong le ea pelo ea Hae ho pholosa ba lahlehileng. E beha pele tseo a li behang pele.

Bala 1 Timothea 2:3, 4 le 2 Petrose 3:9. Litemana tsee li re bolella eng ka pelo ea Molimo? Ke eng eo a e nkang e tla pele?

Molimo o chesehella ho pholosa batho. Ha ho se fetisang ka molemo ho Eena. Ke cheseho ea Hae e tiileng hore “bohle” ba bolokehe ‘me ba “fihlele tsebo ea ‘nete” (1 Tim. 2:4). Ha a “rate ha ba bang ba ka timela, empa o rata hore bohle ba finyelle pakong” (2 Pet. 3:9). Ha e bua ka temana Ena, The SDA Bible Commentary e supa hore lentsoe la Se-Gerike le sebelisitsoeng ho bolela “rata” ke boulomai, le hlalosang “tšekamelo ea kelello, ea ‘ho batla’ kapa ‘ho lakatsa.’” E be hape e fana ka tlhomomeliso e chabileng ea lentsoe empa. Lentsoe la Se-Gerike bakeng sa “empa” ke alla. Le sebelisitsoe mona “ho thatiselletsa phapano e mahareng a ho se utloisise sebopelo sa Molimo, e leng, hore Ee ka ‘na eaba o batla ha ba bang ba ka timela, le ‘nete ea hore o rata ha bohle ba ka bolokeha.’” — The SDA Bible Commentary, pok. 7, leq. 615. Taelo ea Kreste bakeng sa e mong le e mong oa rona ke ho nka karolo thomong ea Hae re le lipaki tsa lerato le mohau oa Hae, le ‘nete ke lehlomela la taba-tabelo ea Hae ea hore batho bohle ba bolokehe.

Bala Liketso 13:47 ‘me u e bapise le Esaia 49:6. Molaetsa oo o no lebile ho mang pele? Moapostola Pauluse o o sebelisa joang?

Ho na le linako tseo boporofeta ba Testamente ea Khale bo amehang ho feta ha ‘ngoe. Mona moapostola Pauluse o nka boporofeta bo neng bo bua le Israele pele ‘me bo porofeta Mesia (sheba Esa. 41:8, Esa. 49:6, le Luka 2:32) e be o u amahanya le kereke ea Testamente e Ncha. Ha kereke e lesa kapa e nnyenyefatsa taelo ea Kreste e tla be e hloleha sepheong sa boteng ba eona hape e fosa pitso ea eona ea boporofeta lefatšeng.

Ho Susumetsoa ke Lerato

Bekeng ena re ile ra talimana le ho araba pitso ena, “Hobaneng bopaki?” re fumane hore ha re arolelana ka tumelo ea rona, re ba le thabo ea ho sebetsa ‘moho le Molimo thomong ea Hae lefatšeng. Bopaki ba rona ba lerato la Hae bo fa batho menyetla e meholo ka ho fetisa ea pholoho, ka hoba ba tseba ho bona ka ho hlaka ho fetisang mohau le ‘nete ea Hae. Ka nako e tšoanang, ho paka ke o mong oa litsela tsa Molimo tsa ho re holisa semoeng. Ho hloleha ho arolelana ka seo Kreste a re etselitseng sona ho bolaea bophelo ba rona ba semoea. Ho paka ho re hokahanya le Eo ea laba-labelang hore batho bohle ba bolokehe. Ke ketso ea kutlo ea taelo ea Hae. thutong ea kajeno re tla ithuta ka tšusumetso ea ho paka e kholohali ho feta tsohle.

Bala 2 Bakorinthe 5:14, 15, 18–20. Ke eng se neng se fa Pauluse a matla a ho fihlela liteko, lithoriso, mathata, le maima ka lebaka la evangeli? Matla a tšoanang a ka re susumetsa joang ho kenya bosebeletsing ba Kreste?

Moapostola Pauluse o ne a susumetsoa ke lerato. Ho na le lintho tseo u ka li etsang ka lebaka la lerato tseo u ke keng oa li etsa ka mabaka a mang a sele. Ha moapostola a phatlalatsa a re, “Lerato la Kreste le re tlamile,” o na bua ‘nete ea ka ho sa feleng. Lentsoe tlama le bolela “ho susumetsa, ho khanna, ho laola kapa ho khothalletsa ka matla.” Lerato la Kreste le ne le laola liketso tsa Pauluse hape le susumetsa bopaki ba hae. Ka sepheo se sa thekeseleng le maikemisetso a sisinyeheng, o ile a arolelana ka morero oa pholoho hohle lefatšeng la Mediterranean. “E ka khona lerato le lule ka pelong. Mokreste ea chatsi o fumana tšusumetso ea liketso tsa hae leratong la tebileng la hae ho Morena oa hae. ho nyoloha metsong ea lerato la hae ho Kreste ho kolla thahasello e sa ikhabeng ho baena ba hae.” —Ellen G. White, *The Adventist Home*, leq. 425. Ha re hlokomela ka botebo sehlabelo se sehlo sa Kreste bakeng sa rona, re hlolloa ke lerato la Hae ‘me re susumetseha hore re arolelane le ba bang ka seo a re etselitseng sona.

Eo ea entseng tlhohleho eohle (lipokello tsa linaledi le mafatše, linaledi, le makhotla a manyeloi, tlhohleho eohle ea maholimo, mafatše a mang) ke Eena ea ileng a re shoela sefapanong. Ke joang ‘nete e makatsang ee e ke keng ea tsosa lerato ho Molimo le takatso ea ho arolelana lerato leo?

Ho Ithuta Haholoanyane:

Bala Ellen G. White, “God’s Purpose for His Church,” Maq. 9–16, ho *The Acts of the Apostles*, le maq. 822–828 ho *The Desire of Ages*. Kereke ea Testamente e Ncha e ne e tobane le kotsi ea ho hloleha ho utloisisa sepheo sa boteng ba eona. Ellen G. White o hlalosa kotsi ena: “Litlhoriso tse ileng tsa tlela kereke e Jerusalema li ile tsa fana ka matla a maholo mosebetsing oa evangeli. Bosebeletsi ba lentsoe bo ne bo atlehile haholo sebakeng seo, ‘me ho ne ho na le kotsi ea hore barutuo ba tla lula moo nako e telele haholo, ba se ba sa natse thomo ea Mopholosi ea ho ea ka lefatše lohle. Ka ho lebala hore matla a ho hlola bobo e fumaneha hantle ka ho fetisisa ha ho sebetsoa ka matla a maholo, ba ile ba qalella ho nahana hore ha ba na mosebetsi o bohlokoa ho feta oa ho sireletsa kereke e Jerusalema khahlanong le litlhaselo tsa sera. Ho e-na le ho ruta blumeli ba bacha hore ba ise evangeli ho ba so e utloe, ba ne ba le kotsing ea ho nka tsela e tla lebisa moo bohle ba tla khotsosatsoa ke se seng se fihletsoe.” — *The Acts of the Apostles*, leq. 105.

Lipotso tsa Puisano:

1. Talima qotsulo ea Ellen G. White ka hloko, haholo-holo mola oa ho qetela. Ke hobaneng ha le kajeno re lokelang ho ela hloko monyetla oa kotsi e tšoanang? Liqholotsong tsa boromuoa tse re tobileng, hobaneng ha boitšoarō bo joalo bo ne bo tla be bo fosahetse hampe-mpe?
2. U nahana ke hobaneng ha Evangeli ka ‘ngoe e qetella ka taelo e tšoanang? Bala Mattheu 28:18–20, Mareka 16:15, 16, Luka 24:46–49, le Johanne 20:21. See se ne se bolela’ng ho balumeli baa ba mongoa-haholo oa pele, ‘me se lokela ho bolela eng ho rona kajeno?
3. Na ho paka le besebeletsi li ka nkela bophelo ba ‘nete ba semoea sebaka le ka mohla o le mong? Ha ho le joalo, ke joang, ‘me re ka ela leraba leo hloko joang?
4. Sehlopheng, buisanang ka karabo ea potso e qetellong ea thuto ea Labobeli, e mabapi le kamoo ho paka le besebeletsi li amang khohlo ea hau ea semoea. U ithutile lintho li fe tse ka thusang le ba bang? U ile oa etsa liphoso li fe tseo u ka thusang ba bang ho li qoba?
5. Thuhisa taba e hlollang ea hore Molimo o re rata e ‘mong le e mong ka bonngoe ba rona. U utloisisa see se bolela eng? Taba ee, eo mohlomong e leng ea bohlokoa ka ho fetisisa maholimong le mafatšeng, e lokela ho ama tsela eo u phelang ka eona joang?